

TI SI QUE VALES: AUTORAS MÁIS DESTACADAS NO BOLETÍN DAS CIENCIAS

PINTOS BARRAL, Xoana

Universidade de Santiago de Compostela

LISTE LÓPEZ, Socorro

IES Pontepedriña. Santiago de Compostela

Movidas polo noso interese na historia da ciencia dende unha visión de xénero e co galo do XXV aniversario de ENCIGA, abordamos o pasado ano unha análise da participación das mulleres como autoras no Boletín das Ciencias. A presenza das socias na revista a través das súas comunicacións distaba moito de ser equiparable á dos varóns, pois os artigos escritos só por mulleres representaban un 14.74% respecto do total.

Á vista de tan calamitosos resultados, decidimos facer algo que puxera en valor o traballo de aquelas máis sobresaíntes, entendendo o termo como aquelas cun maior número de achegas, salientando en especial ás que escribiron en solitario, ou cuxa sinatura era a primeira xa que a disparidade de xénero tamén se observa na orde de asinamento, sendo a porcentaxe de participación feminina respecto das mulleres que escriben en solitario do 19.5% en ciencias naturais, 17.4% en artigos interdisciplinares, 10.7% matemáticas e só 8.3% en física e química.

Preparamos unha enquisa coa teima de descubrir ás mulleres que se atopan detrás destes traballos, indagar encol das súas opinións e vivencias, pero quixemos facelo dun modo máis actual e máis dinámico, fuxindo da naftalina para non resultar tediosas así que decidímonos por gravar o encontro con cada unha das autoras. Agardamos que, coma nós, quededes atrapadas nas súas interesantes e divertidas confesións.